

## Jeju Na Mehkwỳ Jakrã Cunea Wỳr JUTA JÕ KÀHHÔC

Ỡhỹ, pê Juta pê Jeju jarkwa na memprar catêjê nõ, ne hanea ne cupê Jeju tõi te amji to hapu na kjê. Ne cute pjê cunea kam Jeju na mehkwỳ atajê cunea mã, pom cu me hõkàhhôc cahyt ita kujahêc par. Na pê hõ kàhhôc ita japyr pê **Jeju Na Mehkwỳ Jakrã Cunea Wỳr, Juta Jõ Kàhhôc** (Juta). Ne kam cute, por me cupê Jeju na mehkwỳ na me amji jarên cacrô, cute amji kam me hapac xà kên kam menxyre to me cumãihhêj xi atajê cawpa.

### *Juta te amji jarên xà*

<sup>1</sup> Hàpà Jeju kam cu ajpên to me pahkjêjê atajê! PorPahpãm te amji mã me acapi ne me anahàhwỳr atajê. Ipê Juta, ne ipê Tijac tõi, ne ipê Jeju Crixto mã ijàpên catê, ne itea wa me amã ihkàhhôc ita ton. Por Pahpãm mã me akĩnti, mã Jeju Crixto meapytà atajê mã, wa ite ton.

<sup>2</sup> Ne imã me ana Pahpãm mã icakôc xà te hajỹr he:

— Me pahkwỳ caprĩa ne, ne me caxwãm pê me cumã mehcarĩcti gõi, ne amã mehkĩnti ne. Na ca ha me cumã, pom ite amã ampo crê jarênitajê catia ne agõi — hajỹr.

*Pê mehhêj xi catêjê kwỳ aracri mehkwy mã axà, ne me cumã ihhêj*

*1 Timot 1.18-20*

<sup>3</sup> Ỡhỹ, imã me ikwỳ kĩnti atajê. Pê wa ramã ite me amã ihhŏc xà na amji kampa, ata pê Pahpãm te me pahkên pê me pahpytâr xà. Na wa ite ajmâr me amã ahna ihhŏc. Ne ajteare mã iteto amji kam ijapac, ne hỹrmãipipkjêr xà na, me amã ihhŏc. Pê Pahpãm ramã me pamã cute amji kam hapac xà to hahkre, ne me pamã hŏr pyxit, pahte me to amji pytâr xà na. Cwỳrjapê wa ha ate me Pahpãm to ate amji kam hapac xà ita jamâr, ne me hũtâr, ne me to amji jahŏt prãmte, wa ha ahna me amã ihhŏc.

<sup>4</sup> Ne ampo na mã wa ha me amã ihkàhhŏc ita hŏc to hane? Nee mã ampo na nare. He ramã mehkên catêjê kwỳ aracri me pahcatât kre na me hâr. Atajê cunea pê ampo kêanre to hahkre catêjê, ne me cumã Pahpãm kĩnnare, mã ma amempar caca. Ne cute Pahpãm te amji kam hapac xà intête me ato ipintuw prãmte, me amã ihhêj xia jarên to:

— Gapacta ne ate amji mã me ampo kên ton to prãm atajê cunea ton to me apa. Quê ha Pahpãm hŏtpê me acaprĩ, ne nee me anŏ kên mãme anŏ mên nare, hahpan xà na — hane. Ne mêr ampo na mã ame amã ampo kên itajê to hahkre to hane? He taa me ton to me ipa, na ri amji kŏat me amã me to hahkre. Ne ramã ma ame Pahpãm me, me pajŏPahhiti pê Jeju Crixto caca, ne ma ame curê. Atajê quê ha ihtỳj mehkên mã me axà. Ampo na? He pê rỳ pêa mã Pahpãm jŏ kàhhŏc kam ramã me ahna ihhŏc.

*Cu ha Pahpãm tekjê na me amji jarê, ne nee catyt kam me papa nare nare*

*1 Timot 3.1-9; 2 Petrô 2.1-17*

<sup>5</sup> Na wa ha cute me hajÿr catêjê me, ate ajpên cujtêna me amã ihhóc, ne me amã to hahkre, mâr ca atÿj me ajpên cujtê ne me ajpên mã. He pê mam me panquêtjê kwÿ atajê hanea ne ajco cute me amã ampo to hahkre xà kên itajê kwÿato, ajco mehkwy mã hahkre to me ipa, ne mehkên mã me axà. Cwÿrjapê ca ha ita pê amji to me guphê. Ne ramã ate me ampo itajê cunea jahkre pej, na ca ate meto amji japackre prãnte, wa me amã harê. Ne pê Pahpãm Ejit jô pjê kên pê me panquêtjê kwÿ cunea pytã, ne me to cato, cakrô pê ihtÿjcute mempar nare catêjê cunea jipej, por pjê kam pã caprÿhti ata kam.

<sup>6</sup> Jïkjê na pê cõjkwa kam mam Pahpãm mã memprar catêjê jãhtõa ne cute me cumã hàpên jicu, ne mam me hàpên xà ata jirõa pê cute mehnõ to cati ne me to impej to prãm to, hacpÿa mã Pahpãm na me apkjê. Pê Pahpãm amji na me hahkre pej, ne mehcunea pro ne wakÿre to mehcunea juwapre, ne me pajarãa mã, awcapãtkõti ata kam me hãm. Mã cormã curia mehcuhhê, rohnÿttimã. Ne quê ha ahnaa Pahpãm te me pahcukij, ne me pahto ipicokjêr xà jõ amcro kam ahtwÿ, quê ha hipêr mehkên mã me axà.

<sup>7</sup> Ata jïkjê na pê Krïhpóc me Krïhcumrãrti me, ipu na krï kwÿ hÿ na pire mã apu ihcuhê atajê cunea kam, mehkwy me amji kam hapac xà kêanre itajê to me. Atajê pê cute amji pê mehprõ caxun me, me hÿmre jãhtõa te me ajpên

caxun. Cwÿrjapê pêPahpãm cōjkwa pīn me hÿrmã cuhykujate, pê me to caxàr tu. Nãmhã cu cormã me hãm xà pupu, ne ma ihkôt me to amji japackre he.

*Mehhêj xi catêjê mã nee jũm cupa nare*

<sup>8</sup> Cuxà mã, me amã ampo kêanre to hahkre catêjê atajê ihtÿj mehkên xà kêanre itajê ton to me ipa. Ne ihtÿj cute mehkên ton xà atajê kôt meamti. Ne me hī me, cute amji kam hapac xà mea mã, amji pê me to kên, ne ma ame pajō Pahhiti pê Pahpãm par caca, ne ihtÿj me cōjkwa kam cumã memprar catêjê carôt tÿjti atajê incrôn kêanre.

<sup>9</sup> Pê quêt cōjkwa kam Pahpãm mã me hàprêcatêjê jō pahhi pê Miquer neeihcakôc xà to hajÿr nare. Pê Mojxe xwÿ na Miquer me, me pahcurê xwÿn pê Xatanaj ajcaxê, ne me ajpên măn kam tē. Pê nee Miquer harkwa jàmcrôn xà nō to hàmcrôn nare, ne cama hō Pahhiti to me pahcurê xwÿn mã ihcakôc to hane he:

— Quê ha jũ caxuw ijō Pahhiti acrôn xà kêanre nō to acrô — hane.

<sup>10</sup> Ne me hũmre itajê nee me ampo jahkre pej nare kam, ihtÿj me hàwxũn xà kêanre kam pra. Ne ihhêj rũm me cupê ampo jàprê te amji kôt hakopnare ata, ne ihtÿj ame jũ măn to me ipa, atato quê ha me taa me amji kên mãme amji mē, ne me hamre pa.

<sup>11</sup> Ỡhÿ, quê ha ihkên mã hàr to hanea, pom quê pê me panquêtti Cãn apu ihtō caca ne ihcura he. Pê Parãw xwÿ ata hanea ne ihkên xà ata to. Ne cute mehkwyà mã ihkêanre xà to hahkre

jahpan xà na, ajco me curê xwỳn atajê jũhkra kamamcwa. Pê Cõre xwỳ ita hanea ne mehkwy to pahhi na apkjê ne ame kam incryc. Jĩkjê na mã menquêtjê atajête amji kam me hapac xàa to me amji kampa he, ne ihtỳj me amji cura, ne amji to me hakràj to prãm, ne pahhi cuna mã mehcahôc kêanre. Hõ, pê menquêtjê incrê atajê ame hane ne mehcunea me hamre tu, ata jĩkjê naquê ha me amã ampo kêanre to hahkre catêjê atajê ihtỳj me hamre.

*Mehhêj xi catêjê kôt hamreare*

<sup>12</sup> Ca hõtpê hãn ne me cuprõ, ate ajkam me gápàn ne me akõm prãmte. Ampo na? Nee mã ampo na nare. Pom ca ame cuprõ itajê me amã ajpênkĩnti na, ca me cuprõ. Ne ahnaa ri Pahpãm mã impej, meakam. Ne pom me hũmre kêanreitajê hãn ne me acajpuw acjêj, ita na ri ihkêanre, ne nee mehkõm na mehpahàm nare. Ne ampeaj kam me hõ to mehtũm prãm. Ne ihhêj rũm me apê cupêhkà impejti jakati ata, ne cute me hajỳr catêjê pê ihhêj rũm ampotũmti kêanre te ame atũm xà ata. Ne cute me hajỳr catêjê hõtpê me amã ampo to awjahkre, ne nee me amã hõr nare. Ne jũ caxuw quê me amã ampo atagõ. Ne me cupê ihhêj rũm cama apu ahcakrà, ne nee ta wrỳc nare, mã pjê incràre ata pyràac. Ne me cupê ihhêj rũm pĩxô pàr, mã hãn ne hô xàa kam ahtwỳ, mã nee hô nare ata pyràac. Ne me cupê pĩxô pàr jarê me amã catõtõc, ne ihcapĩr mã incrà neincrà tu ata pyràac.

13 Ne mehkên itajê pê ihhêj rûm côxwa te ihtu to imprar, ne amji jakàn pê cute hàmprô tũmti juwahi ata pyrâac, ne ampeaj kam me kam pahpahàm. Ne me cupê caxêre pê ihkrî xà jamreare ata pyrâac, ne amjiakôt ame ipa. Pê Pahpâm awcapàtkô tycti kam me to awcapê, mâr quê curia ame ipa rohnÿtti mã.

*Quê ha mehhêj xi catêjê mehhêj xi jahpan xà na me amgõ*

14-15 Pê Enoc xwÿ, Atãw xwÿ jakàn pê, rÿ pêa mã ihkrî, ne mehkêanre itajê to hũjarên to hane he:

— Me hõmpu he, quê ha me pajõ Pahhiti pê Pahpãmajpên pjê wÿr cumã me hàpên catêjê impejti jãhtôti atajê to mõ. Quê ha mehcunea cukij, ne mehkên catêjêcunea kên mã me cumê. Pom me Pahpâm par nare itajê me, cute me ampo kên ton to me ipa catêjê me, cute Pahpâm cuna mã mehçakôc kêanre atajê me, quê ha mehkên mã me cumê — hane. Hõ, pê Enoc xwÿ me to hũjarên to hane.

*Mehhêj xi catêjê te amji kam me hapac xà kêanre*

*Carati 6.1-2; 2 Petrô 3.3; Tijac 5.19-20*

16 Ne ampeaj kam me hũmre itajê jãhçahhõn xi, ne cute me ahna xwÿ xi, ne cute me ampo kên xen. Ne ampeaj kam me harkwa cràre, kôt hamreare, ata to cute amji to me hàmnãn xi. Ne cute me cupê ampo cwÿrprãmte me hàhcukrêj kôt me cumã ihtÿj nare, nehãn ne me cumã ihçakôc rerecre, ne impejti na, me harê.

<sup>17</sup> Ÿhỹ, me ijŏ ikwỳ nŏ catêjê, nee ca meapê mam itajê pyrác ne apu cute me hajỹrcatêjê impar nare, ne quêt me pajŏ Pahhiti pê Jeju Crixto mã memprar catêjê to, ca me amji japackre kam me to acrà.

<sup>18</sup> Pê hŏtpê ajco me amã me amji to hũjarên to hane he:

— Jeju te amji jaxàr xà jŏ amcro atajê kam, quê ha mehũmre kêanre itajê me awỳr me cato, necatyt kam me apa ita na, cama ame ana acxa. Ne amjia kôt, Pahpãm kaj na, cute amji mã me ampo kên xen xà atajê kôt ame pra — hane.

<sup>19</sup> Ne cute me hajỹr catêjê ri ihtỳj me ato ajcokjê. Ampo na? Me kam Pahpãm Carŏ Pejti nare na ri. Mã amjia kôt, cute amji mã me ampo kên xen xà atajê ton to pit mã, me amji mã ihmipej to me ipa.

*Cu ha Pahpãm te amji kam me pajapac xà to ajcamẽ*

<sup>20</sup> Me ijŏ ikwỳ nŏ catêjê, ca hanee me hajỹr nare, ne quêt cama amji to meapicamên to me mŏ, Pahpãm te me akam amji to ihmipej xàa na. Ne cumã me acakôc xà wỳr, quê ha Carŏ Pejti cumã acakôc to me amã hahkre, ca ha harkwa kôt cumã me acakôc.

*Ampo crê itajê to cu ha me, Jeju te amji jaxàr xà jikaj xà na*

<sup>21-23</sup> Ne me pajŏ Pahhiti pê Jeju Crixto mã me pahcaprĩ catia ata, quê ha ihtỳj jũ caxuw amji wỳr me pajaprô. Cu ha pahtỳj cahê na amji to me papijaparrohnỳtti mã ata jŏ amcro, cu ha me hikaj. Hŏhŏ, ampocrê itajê to ca ha

me, Jeju te amji jaxàr xà jikaj xà na. Ca ha Pahpãm mã me pahkĩnti ita to, nee amji pê me gapac kêt nare. Ne pom kyre pê Pahpãm kôt me ipa itajê, ca ha me caprĩa ne, neme cumã aprĩa kam, mehkĩnti kam, me hapackre to me apa, hacpỹa mã Pahpãm jŏ pry kam mehpỹm prãmte. Ne pom cute amji mã me ampo kên xenti itajê, ca ha hanea ne me caprĩ, ne guphêa rũm mehtehcajpar tome apa, cõt ca hanea ne mehkôt me pahcurê xwỹn jŏ cuhyhti mã me axã.

*Cu ha Pahpãm te me pahto ihtỳj pyrên me pajakry na, cumã me amji jarẽ*

*1 Petrô 1.5-7*

<sup>24</sup> Ne Pahpãm Pejti na me to pahcakôc xà impejti itajê to, cu ha cumã me pahcakôc he:

— Me ijŏ Inxũ, ca ha atỳj me ijamã, wa ha nee apê me ikên nare, ne nee apê me gŏ pry hyr nare. Na ca ha ma amji wỳr me ijaprô, ite curiakrĩ xà ita kam acahê na me ikrĩ xà na. Na wa ha curi me ipej pit na acuna mã me xa, por wa nee me ikrã kam ampo kên to me amji kam ijapac nare itajê me, me ijĩ tũm nare itajê me, wa ha curi acuna mã me xa, neampeaj kam ahna me ijakry. Ne imã mehcunea te acatihti na me gahkre pej ne apupun name to prãmte hajỹar, pom quê hãn ne mehcunea me hàhcujro xà nõ jàhcujrohti pupu he.

<sup>25</sup> Ne apyxit peaj, ne apê Pahpãm, na ca ateakra pê me ijŏ Pahhiti pê JejuCrixto to me imã me ipytàr catê. Ne ateampo cunea jahkre pej catia. Mã quêtmehcunea, ampo cunea jirôa pê amji mã me acupa. Ne me cupê pahhi cunea jirôa pê quêt apê Pahhiti cati, ne mehcunea jirôa



pê acarôt týjne cati. Ne me imã mehcunea te  
ampo itajê cunea na me gahkre pej na me ato  
prãm. Pê ca mam ahnaa akrĩ, ne cormã ahnaa  
to akrĩ, rohnýtti mã — hane. Hamre.

**PAHPÃM JARKWA CUPAHTI JÕ KÀHHÔC**  
**Canela: PAHPÃM JARKWA CUPAHTI JÕ KÀHHÔC**  
**(Portions)**

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 1 Oct 2024 from source files  
dated 29 Jan 2022

09d4e460-c38b-52b7-81c1-8300bfeb466a